

Shalom, boyei malamumu. Tótalela elongo maloba ya bomoi ya Nkolo na biso.

Bandeko, soki obungisi elikya oyo ezalaka kaka kati na YESU, ekómaka mpasi mingi kosilisa mobembo ya bomoi awa na mokili na bokengi. Ata soki okomimonisa lokola ozali na esengo mingi, esengo wana ezalaka ya lokuta. Bandeko na ngai, okoki te kolonga mokili oyo etondi na komekama, na mikakatano, na pasi, mpe na mitambo mingi ya monguna. Okoki te. Ata olobi ozali na mbongo mingi ndenge nini, okokóma kaka esika moko okotambolama na mai. Ata otye motema na moto moko boye, bomoi ya seko okokoka kozwa yango te.

Yango wana Yesu Nkolo alobaki ete, mpo ndako ezala ya bokengi, esengeli etongama liboso likoló ya moboko (fondation). Soki etongami na moboko te, ekokóma ntango moko, ata mopepe makasi soki epumbwi kaka, ndako wana ekokweya. Moboko wana azali Yesu Kristo. Tángá:

Matai 7:24-25 (Mokanda na Bomoi)

“Yango wana, moto nyonso oyo ayokaka maloba na ngai mpe asalaka yango, akokani na moto ya bwanya oyo atongi ndako

na ye likoló ya libanga makasi.

Mbula enokaki, mai ekómaki, mopepe epumbwaki mpe ebétaki ndako wana, kasi ekweyaki te, mpo moboko na yango etongamaki likoló ya libanga.”

Kasi lisusu, ezalaka mpe na bisika mosusu oyo okoki te kotumba moboko na se na yo, mpo na se etondi na mai mingi: ebale monene, ebale ya mozindo, to ebale ya monene lokola mbu. Na ndakisa, bato oyo batambolaka na masuwa bayebi ete mpo bábátela bomoi na bango liboso ya mopepe makasi to ya mpela, esengeli batambola na eloko moko ya ntina mingi oyo babengaka nanga.

Mosala ya nanga ezali kokita mozindo mingi, kino ekóma esika mbu to ebale esilaka, mpe ekutana na libanga na se. Soki nanga esimbi libanga wana makasi, ata mpela makasi ndenge nini eleka likoló, ekómaka mpasi masuwa ekómbama to ekobaluka.

Ezali lolenge ya nanga: ekendaka mosika mingi mpenza koluka moboko, eloko oyo biloko mosusu nyonso ekoki kosala te. Moboko

ya ndako ekitaka kaka na bamétre mibale to misato, kasi nanga ekoki kokita ata bamétre nkama misato to nkama mitano, koluka libanga makasi.

Ndenge wana nde ezalaka mpo na moto oyo andimi Yesu na motema na ye mobimba. Banda ntango wana, Nzambe abandaka kosala likambo moko monene: atiyaka nanga ya molimo, oyo babengaka ELIKYA, nanga oyo ekendaka mbala moko kino na motema ya Kristo, Libanga ya solo. Ezali kokangisa yo na Ye, kino ata mbonge makasi ya bomoi ekoya, ekoki te kozindisa yo, ata soki na se na yo ozali komona moboko ata moko te.

Okoleka mikakatano ya ndenge na ndenge, okokutana na pasi, na kozokisama, na komekama ya lolenge nyonso mpo na kondima na yo. Kasi kopikolama na nzela ya lobiko ekosalama ata moke te. Bato bakotala yo baloba: “Moboko na ye emonanaka te!” Bakomona kaka singa moko moke ekiti na mai. Kasi na se, ezali na ebende monene, ya kilo, ekangami makasi na Libanga ya makasi mingi, Yesu Kristo. Yango wana okoki kotikala kozala kotungisama te na mbonge ata moko ya Zabolo.

Baebre 6:18-20 (Mokanda na Bomoi)

*“Biso oyo tokimaki mpo na kokanga elikya oyo etyelami liboso na biso,
tozali na yango lokola NANGA YA MOLIMO, YA KOKENGAMA MALAMU, YA NGUVU, oyo ekotaka kino kati ya esika ya kati ya rido,
esika Yesu akotaki mpo na biso lokola motambolisi liboso, akómaki Mokonzi ya Banganga-Nzambe mpo na libela, kolanda lolenge ya Melkisedeke.”*

Kasi soki opesi Kristo bomoi na yo naino te, to ozali kaka moto ya vuguvugu — lokolo moko kati, mosusu libanda — Nzambe akoki kotia elikya oyo te kati na yo. Yango wana okomona bato mosusu, mpela moke kaka ekomi, bazongi lisusu na mokili. Mpo balingaki te kolanda Yesu na motema na bango mobimba. Nanga wana ekitisamaki te mpo ekutana na Libanga oyo eninganikaka te.

Bandeko, lobiko ezali likambo ya solo mpenza, mpe ezali nguya ya Nzambe ya solo. Moto nyonso oyo azwi mokano ya kolanda Yesu, esengeli nanga oyo ekitisama na ye na nkama moko na nkama. Omipesa te na losambo ya lingomba, to na ebongiseli, to na moto oyo amibengaka ntoma to mosakoli. Eloko moko te kati

na yango ekoki kobikisa yo. Kristo kaka ye moko.

Lobiko eyaka na kondima mpe na kobatisama. Tango ondimi, okómi mbala moko pene ya kokende kobatisama na bobatisi ya solo: kozindisama na mai mingi, na Nkombo ya YESU KRISTO. Sima ya yango, obandaka kobika bomoi ya moto oyo abikisami.

Kuna nde Nzambe atiyaka elikya oyo kati na yo, oyo mbonge ata moko ya monguna ekoki te kolongola yo.

Yango wana, soki ozali libanda ya Kristo, to ozalaki vuguvugu mpe mokili elongaki yo, sikoyo nde ntango na yo ya kosala mokano ya solo. Zwa mokano liboso na motema na yo, sima fukama, sala bobongoli motema, lakisa ete ozali na posa ya lisungi ya Nzambe, pesa masumu na yo, mpe banda koluka bobatisi ya solo ya kozindisama na mai mingi. Sima, banda kobika bomoi oyo ekokani na bobongoli motema na yo.

Banda ntango wana, okomona mbongwana monene na bomoi na yo tango Molimo Mosantu akokota kati na yo, mpo lobiko ezali na nguya koleka eloko nyonso mosusu awa na mokili.

Nkolo apambola yo.

NANGA YA MOLIMO, YA KOKENGAMA MALAMU

Share on:
WhatsApp